

**2016-imi aningaasanut inatsisissatut siunnersuut**

**pillugu**

**Aningaasaqarnermut Akileraartarnermullu Ataatsimiititaliap**

**ISUMALIUTISSIISSUTAA**

**Inatsisissatut siunnersuutip aappassaaneerneqarnissaanut saqqummiunneqartoq**

Ataatsimiititaliaq suliarinninnermini kingullermik ukuninnga inuttaqarpoq:

Inatsisartunut ilaasortaq Jens Imanuelson (Siumut), siulittaasoq  
Inatsisartunut ilaasortaq Steen Lynge (Atassut), siulittaasup tullia  
Inatsisartunut ilaasortaq Jess Svane (Siumut)  
Inatsisartunut ilaasortaq Tillie Martinussen (Demokraatit)  
Inatsisartunut ilaasortaq Naaja Nathanielsen (Inuit Ataqtigiit)  
Inatsisartunut ilaasortaq Sara Olsvig (Inuit Ataqtigiit)  
Inatsisartunut ilaasortaq Peter Olsen (Inuit Ataqtigiit)

**Imarisai:**

1. Aallaqqaasiut	4
1.1 Aningaasanut inatsisissatut siunnersuutip ilusiligaanera aningaasaliisarnermilu maleruagassat	4
1.2. Inatsisartut ataatsimiititaliaasa akuutinnerat	5
1.3. 2016-imi aningaasanut inatsisissatut siunnersuut	5
1.3.1 Ataatsimoortumik tulleriihaarissamik tunngavik	5
1.3.2 Maannakkut aningaasanik aqutsineq pillugu Aningaasaqarnermut Siunnersuisoqatigiit oqaaseqaataat	5
1.3.3 Allannguutissatut siunnersuutit	6
1.3.4 Aningaasaqarnermut Ataatsimiititaliap ataatsimut isigalugu isummernera	8
2. Aningaasaqarnermut Ataatsimiititaliap apeqqtai/oqaaseqaatai aalajangersimasut – suliassaqaqarfinnut agguataarlugit	8
2.1. Suliassaqaqarfik 10-12 Naalakkersuisut siulittaasuat	9
2.2. Suliassaqaqarfik 20-24 Aningaasaqarnermut Aatsitassanullu Naalakkersuisoq	10
2.3. Suliassaqaqarfik 30 Ilaqutariinnermut, Naligiissitaanermut Isumaginninnermullu Naalakkersuisoq	10
2.4. Suliassaqaqarfik 34-35 Peqqissutsimut Naalakkersuisoq	11
2.5. Suliassaqaqarfik 40 Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisoq	12
2.6. Suliassaqaqarfik 50-51 Aalisarnermut, Piniarnermut Nunalerinermullu Naalakkersuisoq	12
2.7. Suliassaqaqarfik 62-66 Inuussutissarsiornermut, Suliffeqarnermut, Niuernermut Nunanullu Allanut Naalakkersuisoq	12
2.8. Suliassaqaqarfik 73-77 Pinngortitamut, Avatangiisinut Inatsisinillu Atuutsitsinermit Naalakkersuisoq	13
3. Aningaasaliissutinut allannguutissatut siunnersuutit	13
3.1. Sammisqaq 1 – Aaqqissuinikkut allannguutit	14
3.2. Sammisqaq 2 – Missingersuutinut sunnuteqanngitsumik allannguutit	14
3.3. Sammisqaq 3 – Isertitaqarnerunissamik inatsisitigullu aningaasartuutinit pissusaaffigisanit naatsorsuutit nutaat	14
3.4. Sammisqaq 4 – Aningaasartuuteqarnerunissamik kissaatit	15
3.5. Sammisqaq 5 – Ilanngaassivik	15
3.6. Sammisqaq 6 – Kontumit pingaarnermit atugassanngortitsineq, 20.11.56 Missingersuutinik iluarsineq, allaffissorneq	16
3.7. Sammisqaq 7 – Kontumit pingaarnermit atugassanngortitsineq, 20.11.70 Suliniutinut nutaanut sillimmatit	16
3.8. Sammisqaq 8 – Qorlortorsuarni erngup nukiliorfiup allinera	17
3.9. Sammisqaq 9 – Konto pingaarnermi 24.13.50 Akileraartarnermi akitsuusiisarnermilu isertitaqarnerulernissamat sillimmatit	18
4. Oqaasertaliussanut allannguutissatut siunnersuutit	19
5. Aningaasaqarnermut Ataatsimiititaliap inassuteqaatai	22

**Ilanngussanut takussutissiaq:**

- A. Aningaasaqarnermut Ataatsimiititaliap 28. september 2015-imi Naalakkersuisunut apeqputai.
- B. Aningaasaqarnermut Ataatsimiititaliap apeqputaanut Naalakkersuisut akissutaat, tak. ilanngussaq A.
- C. Aningaasaqarnermut Ataatsimiititaliap Inatsisartut ataatsimiititaliaannut 29. september 2015-imi tusarniaalluni allagaa.
- D. Ataatsimiititaliat tusarniaanermut akissutaat, tak. ilanngussaq C.
- E. Naalakkersuisut aningaasaliissutinut allannguutissatut siunnersuutaat 22. oktober 2015-imeersut. (Allannguutissatut siunnersuutit nr. 1-48).
- F. Naalakkersuisut oqaasertaliussanut allannguutissatut siunnersuutaat 22. oktober 2015-imeersut. (Allannguutissatut siunnersuutit nr. 49-63).
- G. Naalakkersuisut Siulittaasuannik siunersiuinissamut aggeqqusissut 21. oktober 2015-imeersaq kiisalu tassunga atatillugu siunersiuinermut allakkiaq.
- H. Aningaasaqarnermut Aatsitassanullu Naalakkersuisumik siunersiuinissamut aggeqqusissutit 21. oktober aamma 25. oktober 2015-imeersut kiisalu tassunga atatillugu siunersiuinermut allakkiaq.
- I. Ilaqutariinnermut, Naligiissitaanermut Isumaginninnermullu Naalakkersuisumik siunersiuinissamut aggeqqusissut 22. oktober 2015-imeersaq kiisalu tassunga atatillugu siunersiuinermut allakkiaq.
- J. Peqqissutsimut Naalakkersuisumik siunersiuinissamut aggeqqusissut 22. oktober 2015-imeersaq kiisalu tassunga atatillugu siunersiuinermut allakkiaq.
- K. Ilinniartitaanermut, Kultureqarnermut, Ilageeqarnermut Ilisimatusarnermullu Naalakkersuisumik siunersiuinissamut aggeqqusissut 23. oktober 2015-imeersaq kiisalu tassunga atatillugu siunersiuinermut allakkiaq.
- L. Aalisarnermut, Piniarnermut Nunalerinnermullu Naalakkersuisumik siunersiuinissamut aggeqqusissut 23. oktober 2015-imeersaq kiisalu tassunga atatillugu siunersiuinermut allakkiaq.
- M. Inuussutissarsiornermut, Suliffeqarnermut, Niuernermet Nunanullu Allanut Naalakkersuisumik siunersiuinissamut aggeqqusissut 21. oktober 2015-imeersaq kiisalu tassunga atatillugu siunersiuinermut allakkiaq.
- N. Pinngortitamut, Avatangiisinut Inatsisinillu Atuutsitsinermut Naalakkersuisumut 24. oktober 2015-imi apeqputit taakkunungaluk akissutit.
- O. Ineqarnermut, Sanaartornermut Attaveqarnermullu Naalakkersuisumik siunersiuinissamut aggeqqusissut 21. oktober 2015-imeersaq.

## **1. Aallaqqaasiut**

2016-imi aningaasanut inatsisissatut siunnersuut Inatsisartunit ulloq 30. september 2015-imi siullermeerneqarpoq. Inatsisartut Naalakkersuisullu pillugit inatsimmi § 16, imm. 1 naaper-torlugu aningaasanut inatsisissatut siunnersuutip aappassaaneerneqarnissaata pingajussaa-neerneqarnissaatalu akornanni Aningaasaqarnermut Ataatsimiititaliaq aningaasanut inatsisissatut siunnersuut pillugu Inatsisartunut isumaliutissiisuteqassaaq.

Aningaasanut inatsisissatut siunnersuut Qasigianguani 17.-20. august 2015-imi missingersuutit pillugit isumasioqatigiinnermi Aningaasaqarnermut Ataatsimiititaliamit misissorneqarpoq. Aningaasanut inatsisissatut siunnersuummik misissuinini suliarinninninilu tunngavigalugit apeqqutini oqaaseqaatinilu Naalakkersuisunut ulloq 29. september 2015-imi allagaqarnermigut Aningaasaqarnermut Ataatsimiititaliap nassiuppai. Ilanngussaq A innersuussutigineqarpoq. Ataatsimiititaliap apeqqutaanut Naalakkersuisut 19. oktober akissutaat pillugit ilanngussaq B innersuussutigineqarpoq.

Tamatuma saniatigut ulloq 21. oktober 2015-imi Naalakkersuisut allannguutissatut siunner-suutinik arlalinnik nassiussipput. Taamatuttaaq Inuit Ataqtigiit aammalu Aningaasaqarnermut Akileraartarnermullu Ataatsimiititaliamit allannguutissatut siunnersuutit isumaliutissiissummi saqqummiunneqarput. Taakku isumaliutissiissummi immikkut sammineqassapput.

Inatsisartut aningaasanut inatsisissatut siunnersuummik aappassaaneerinninnissaannut ataatsi-miititaliaq matumuuna isumaliutissiisuteqarpoq.

### **1.1 Aningaasanut inatsisissatut siunnersuutip ilusiligaanera aningaasaliisarnermilu male-ruagassat**

Aningaasanut inatsisissatut siunnersuutip ilusiligaanissaa missingersuutit pillugit inatsimmi kapitali 2-mi 3-milu pingaarnertut aalajangersaavigineqarpoq. Aalajangersakkami tassani allassimasuni allassimavoq aningaasanut inatsisissatut siunnersuutip inatsisissatut siunnersuutit allat assigalugit imarigai inatsisit oqaasertaat nassuiaatitallit.

Inatsisip oqaasertaanut ilaapput siunnersuummi aningaasaliissutininut takussutissaq Ilanngussaq 1-imiittoq aammalu siunnersuummi oqaasertaliussat Ilanngussaq 2-miittut.

Nassuiaatinut ilaapput oqaasertaliussanut nassuiaatit, angusanut kontonullu pingaarnernut takussutissiat kiisalu missingersuutinut ilanngussat.

Nassuiaatit ilusiligaanissaannut piumasqaatinut erseqqinnerusumik nassuiaatit eqqarsaatigalugit missingersuutit pillugit inatsimmi kapitalit taaneqartut innersuussutigineqarput. Missi-ngersuutinulli ilanngussanut tunngatillugu oqaatigineqassaaq taakku imarimmatigit kontoni pingaarnerni ataasiakkaani aningaasaliissutininut tunngavissat erseqqinnerusut. Oqaasertaliussanut tunngatillugu immikkut oqaatigineqassaaq inatsisip oqaasertaatut ilusiligaanertik aqputigalugu Inatsisartut inatsisaasa allat allanngortinneqarnissaannut ilassuteqarfigineqarnissaannulluunniit atorneqarsinnaammata.

Taamaalillunilu aningaasanut inatsisissatut siunnersuutip inatsisissatut siunnersuutinut allanut sanilliulluni ilaatigut allaanerussutigaa missingersuutinut ilanngussat ilusiligaanerannut allan-guutissatut siunnersuutinik saqqummiussisoqarsinnaanera, naak taakku oqaatigineqareersutut inatsisip oqaasertaanut nassuiaatitut ilusiligaagaluartut. Nassuiaatilli sinnerinut, soorlu oqaaser-

taliussanut *nassuiaatinut* allannguutissatut siunnersuutiniq immikkut saqqummiussisoqarsinnaanngilaq.

## **1.2. Inatsisartut ataatsimiititaliaasa akuutinnerat**

Ukiut siulii assigalugit aningaasanut inatsimmik suliarinninnermi Inatsisartut ataatsimiititaliaat Aningaasaqarnermut Ataatsimiititaliap akuutinniarsimavai. Tamanna tunngavigalugu ataatsimiititaliap Naalakkersuisunut aallarniutaasumik apeqqutaasa taamatullu Naalakkersuisut akisutaasa assilineri Inatsisartut ataatsimiititaliaannut ataatsimiititaliamit nassiunneqarput. Aningaasanut inatsisissatut siunnersuutit saqqummiunneqartup naliliiffiginissaanut taama periarfissinneqarneq ataatsimiititalianit arlalinnit ilassilluarneqarpoq. Tamanna akissutinik atorluarneqarsinnaasunik pissarsiviusimavoq, taakkulu sapinngisamik annertunerpaamik ataatsimiititaliap inatsisissatut siunnersuutip pingajussaaneerpeqarnissaanut isumaliutissiissutaanut ilanngunneqassallutik.

Aningaasaqarnermut Ataatsimiititaliap ataatsimiititalianut tusarniaassutitut allakkiaa isumaliutissiissummut uunga ilanngussaq C-tut ilanngunneqarpoq. Ataatsimiititaliat isummersuutaat ilanngussaq D-mut ilanngunneqarput.

Aningaasalersuutissatut siunnersuummik ilanngussisoqarsimangippat aningaasartuuteqarfiumi amerlanerusunik aningaasartuuteqarnissap kaammattuutigiginissaanut Aningaasaqarnermut Ataatsimiititaliap periarfissaqannginnera Aningaasaqarnermut Ataatsimiititaliap periarfissaq iluatsillugu ataatsimiititalianut eqqaasitsissutigaa.

Naallu aalajangiiffigisassatut siunnersuutit ataasiakkaat namminerminni annertuumik aningaasartuuteqaataasussaannikkaluartut ataatsimoorlutik allaffissornikkut aningaasaqarnikkullu nunatta karsiata missingersuutaanut annertuumik kinguneqaateqarsinnaanerit periarfissaq iluatsillugu ataatsimiititaliap eqqaasitsissutigissavaa.

## **1.3. 2016-imi aningaasanut inatsisissatut siunnersuut**

### ***1.3.1 Ataatsimoortumik tullerriaarisarnissamik tunngavik***

Ataatsimoortumik pingaarnersiulluni tullerriaarisarnermik periuseqarneq aningaasaqarnitta pilersaarusiorneqarnerani pingaarnertut tunngaviuvoq. Aningaasaqarnitta pilersaarusiornera paasilertoruminartumik ingerlallugulu inuiaqatigiit aningaasatigut pisinnaasaannut naleqqusakkamik aningaasartuutigut aqutsivigisinnaassagutsigit periuseq taanna aalajangiusimasariaqarparput.

Taamaattumik aningaasanut inatsimmi naatsorsuutigineqartumit amerlanerusunik ingerlatsinnermut aningaasartuuteqarnissamik aalajangernissaq sioqqullugu Inatsisartut Naalakkersuisullu sukumiisumik isumaliutiginneqqaartarnissaat aalajangiisuusumik pingaaruteqarpoq.

Suliassaq taanna Aningaasaqarnermut Ataatsimiititaliap Naalakkersuisullu kisimik naammassisinnaanngilaat, Inatsisartulli tamarmiusut peqataallutillu tapersersuinissaat pisariaqarpoq. Tamanna ukiuni makkunani minnerunngitsumik pisariaqarpoq, tassami aningaasaqarnikkut attassisinnaassuserput annertuumik uloriarnartorsiortinneqartoq aammalu imaaliallaannaq aaqqiissuteqarnissaq ajornartoq erseqqissigaluttuinnarpoq.

### ***1.3.2 Maannakkut aningaasanik aqutsineq pillugu Aningaasaqarnermut Siunnersuisoqatigiit oqaaseqaataat***

Aningaasaqarnermut Siunnersuisoqatigiit Aningaasaqarnermut Ataatsimiititaliamit ulloq 22. september 2015-imi ataatsimeeqatigineqarput. Ataatsimiinnermi sammineqarpoq Siunnersuisoqatigiit nalunaarusiaat saqqummiunneqaqqammersoq. Aningaasaqarnermut Siunnersuisoqatigiit

2015-imi nalunaarutaata imarai aningaasarsiornermi pissutsit, maannakkut aningaasanik aqutsineq aammalu innuttaasut amerlassusaata nikerarnerat nunallu immikkoortuinut politiki.

Aningaasarsiornermi pissutsini ilimagisat pillugit nalunaarusiap immikkoortuani allassimavoq aningaasarsiornermi ingerlatsinermi siuariallatsiarnissaq neriunaateqartoq, tamatumani 2015-imi ineriartorneq siuariarfiussatut naatsorsuutigineqartoq. Siunnersuisoqatigiilli isumaqarput piffissaq qaninnerusoq isigalugu aningaasaqarnikkut pitsanngoriaatissat nunap iluani aqqis-suussaanikkut ajornartorsiutit aqqinneqarsimanerannik pissuteqanngitsut, taamaattumillu siunissaq ungasinnerusoq isigalugu aningaasarsiornerup ineriartornissaani malunnaatilmik allanngortoqarnikuunngitsoq.

Siunnersuisoqatigiit isumaqarput aningaasaqarnerup suli qajannartorujussuusoq aammalu aalisarnerup iluani ineriartorneq apequtaasupilussuusoq. Siunnersuisoqatigiinnit maluginiarneqarpoq pisat ikiliartorsimagaluartut aalisakkat qaleriallillu akigissaarnerat aningaasarsiornerup ineriartorsimaneranut pingaarutilerujussuusimasoq. Aalisarnermi akigitat pitsaanngitsumik ineriartornerat aningaasarsiornermi ajornartorsiortitsipallalersinnaavoq. Taamaattumillu aningaasaqarnerup qanoq ineriartornissaa soorunami nalorninarpoq.

Kalaallit Nunaata 2015-imi aningaasaqarnera pillugu nalunaarusiaminni siunnersuisoqatigiit allapput piffissaq 2016-imit 2019-imut ataatsimut isigalugu pisortat aningaasaqarnerat oqimaaqatigiiffiussasoq. Ukiut siulliit marluk (2016 aamma 2017) amigartooruteqarfiussapput, piffissamili tassani ukiut kingulliit marluk sinneqartooruteqarfiussallutik. Siunnersuisoqatigiit oqaatigaat ukiut siuliini aningaasanut inatsisissat aamma taama isikkoqartarsimasut, tamatumani siunissami iluarsartuusseqqinnerit pisortat aningaasaqarneranni sinneqartooruteqarnissamut qulakkeerinnittussallutik, taamaattumillu aqqis-suussasumik amigartooruteqartarnikkut ajornartorsiutit siumut ajattarpagut. Siunnersuisoqatigiinnit aamma oqaatigineqarpoq iluarsartuusseqqinnissat taakku aammaarluni kinguardeqqinneqarsimasut oqaatigalugulu aningaasaqarnikkut politiki tutsuiginartuussappat tamanna peqqittariaqanngitsoq.

2014-imi aningaasanut inatsisissatut siunnersuutip aappassaaneernejarnissaanut isumaliutissiissummini Aningaasaqarnermut Ataatsimiititaliaq allappoq ataatsimut isigalugu Siunnersuisoqatigiit nalunaarusiaatigut aammaarluni ersersinneqartoq inuiaqatigiit atugarissaarnissaanni "pissutsit taamaaginnarnissaat" attanneqarsinnaanngitsoq.

Matumani oqaatigineqassaaq aningaasaqarnerup attanneqarsinnaasup maannamiit ineriartortinnissaa aalajangiisuusumik pingaaruteqartoq 2013-imi isumaliutissiissummini siuliani taaneqartumi Aningaasaqarnermut Ataatsimiititaliap oqaatigimmagu. Aningaasaqarnikkut politiki attanneqarsinnaanngippat pisortat atugarissaarnermut aningaasaliuttaga atugarsaarnissamut aningaasarsiornermi isertitatut allatulli annertusiartorsinnaanngillat. Allatut oqaatigalugu nalikinnerulissapput. Tamatumani kinguneraa atugarissaarneq attatiinnarneqassappat akileraarutit akitsuutillu qaffattariaqarnissaat.

Taamaattumillu Aningaasaqarnermut Ataatsimiititaliamit oqaatigineqartariaqarpoq akitsuusiinissamik Naalakkersuisut siunnersuutaasa kingulliit aammalu akileraarutit qaffaanissamik allat siunnersuuteqarnerisa kingunerisaannik Aningaasaqarnermut Ataatsimiititaliap ukiut marluk matuma siorna ernummatigisaatut maanna inissisimaleratta.

### ***1.3.3 Allannguutissatut siunnersuutit***

#### **Naalakkersuisut allannguutissatut siunnersuutaat**

Aningaasanut inatsisissatut siunnersuummik Inatsisartut siullermeerinninnerat tunngavigalugu Naalakkersuisut ulloq 19. oktober 2015-imi allannguutissatut siunnersuutit 63-it nassiuppaat.

*Aningaasaliissut* taamatullu *oqaasertaliussanut* allannguutissatut siunnersuuteqartoqarpoq. Allannguutissatut siunnersuutit isumaliutissiisummut ilanngussaq E-tut aamma F-tut ilanngunneqarput.

Naalakkersuisut allannguutissatut siunnersuutaannut Aningaasaqarnermut Ataatsimiititaliap inassuteqaatai isumaliutissiisummi matumani immikkoortuni 3-mi 4-milu takuneqarsinnaapput.

2016-imi aningaasanut inatsisissatut siunnersuutip Inatsisartunit aappassaaneerneqarnissaani Naalakkersuisut allannguutissatut siunnersuutaasa tamakkiisut sunniutissaat ingerlatsineranut, sanaartukkanut taarsigassarsarititanullu inernerusussatut missingersuutininut, IST-p inerneranut 2016-imi 99,3 mio. kr.-inik, 2017-imi 1,9 mio. kr.-inik, 2018-imi 3,9 mio. kr.-inik 2019-imilu 7,1 mio. kr.-inik ajorseriaataassaaq.

2016-imi aningaasanut inatsisissatut siunnersuutip Inatsisartunit aappassaaneerneqarnissaani Naalakkersuisut allannguutissatut siunnersuutaasa tamakkiisut sunniutissaat ingerlatsineranut sanaartukkanullu inernerusussatut missingersuutininut, IS-p inerneranut 2016-imi 27,3 mio. kr.-inik ajorseriaataassaaq aammalu 2017-imi 12,5 mio. kr. pitsanngoriaataassalluni, tamatumalu kingorna 2018-imi 8,4 mio. kr.-inik 2019-imilu 11,6 mio. kr.-inik ajorseriaataaqqissalluni.

Ilanngussaq 1-imi oqaatigineqartutut Naalakkersuisut isummernissaannut tunngavissiami inassuteqaatit akuerineqassappata AIS2016-ip aappassaaneerneqarnerani IST-p IS-illu inerneranut sunniutissat tamarmiusut takussutissiami matuma kingulianiittumi takutinneqarput.

Aningaasat mio. kr.-inngorlugit.	2016	2017	2018	2019
AIS2016-imi IST-p inertera	36,5	-79,8	-55,3	-135,8
AIS2016-imi IS-ip inertera	65,1	62,9	-26,2	-102,7
Allannguutissatut siunnersuutip aappassaaneerneqarnerani IST-p inerneranut sunniutissat	99,3	1,9	3,9	7,1
Allannguutissatut siunnersuutip aappassaaneerneqarnerani IS-p inerneranut sunniutissat	27,3	-12,5	8,4	11,6
IST-p inerneranik aappassaaneerinninneq	135,8	81,6	-51,3	-128,7
IS-ip inerneranik aappassaaneerinninneq	92,5	50,3	17,8	-91,2

Aningaasanut inatsiseqarfiusoq 2016-2019 tamakkerlugu IS-imi amigartoorutaasut tamarmiusut 33,9 mio. kr.-inik annertussuseqassapput. Pingajussaaneerinnittoqarnissaata tungaanut aningaasaliisussarsioritoqassasoq Naalakkersuisut paasissutissiisutigaat, taamaalilluni aningaasanut inatsiseqarfiusumi isertitat aningaasartuutillu oqimaaqatigiinnissaannik anguniagaq eqqortissinnaassalluni. 2016-imi amigartoorutit aamma annikillisarniarneqarput.

Tamatuma kingorna allannguutissatut siunnersuutit saqqummiunneqarnermittut akuerineqassappata 2016-imut aningaasanut inatsisip inertera tassaassaaq **IST-mi 135,8 mio. kr.-inik amigartooruteqarneq aammalu IS-imi 92,5 mio. kr.-inik amigartooruteqarneq**. Piffissaq 2016-2019 tamaat isigalugu annikinnerusumik sinneqartooruteqarfiusasoq Naalakkersuisut naatsorsuutigaat.

Inatsisartuni partiit allannguutissatut siunnersuutaat

Oqaasertaliussanut allannguutissatut siunnersuummik ataatsimik Inuit Ataqtigiit saqqummiussipput. Allannguutissatut siunnersuut Naalakkersuisut oqaasertaliussanut allannguutissatut siunnersuutaannut nr. 55-imut attuumassuteqarpoq.

Aningaasaqarnermut Akileraartarnermullu Ataatsimiititaliap allannguutissatut siunnersuutai

Oqaasertaliussanut allannguutissatut siunnersuummik ataatsimik Aningaasaqarnermut Ataatsimiititaliaq saqqummiussivoq. Allannguutissatut siunnersuut Naalakkersuisut oqaasertaliussanut allannguutissatut siunnersuutaannut nr. 56-imut attuumassuteqarpoq.

**1.3.4 Aningaasaqarnermut Ataatsimiititaliap ataatsimut isigalugu isummenera**

Naalakkersuisut 2016-imi aningaasanut inatsisissatut siunnersuutaat tapersernerlugu tapersinnginnerlugulu Aningaasaqarnermut Ataatsimiititaliap maanna oqaatigisinnaanngilaa. Aningaasanut inatsisissatut siunnersuut pillugu inassuteqaatini inaarutaasoq pingajussaaneerinninnissamat ilassutitut isumaliutissiissummini ataatsimiititaliap saqqummiutissavaa.

Naalakkersuisut aappassaaneerinninnissamat allannguutissatut siunnersuutaasa amerlanerpaartaasa akuersissutigineqarnissaat Aningaasaqarnermut Ataatsimiititaliamit inassutigineqarpoq. Siunnersuutip pingajussaaneerineqarnissaanut allannguutissatut siunnersuutitik allanik saqqummiussinissaq Naalakkersuisut naatsorsuutigaat.

**2. Aningaasaqarnermut Ataatsimiititaliap apeqqutai/oqaaseqaatai aalajangersimasut – suliassaqarfinnut agguataarlugit**

Isumaliutissiissummi ilanngussat A aamma B, Aningaasaqarnermut Ataatsimiititaliap Naalakkersuisunut allagaanik Naalakkersuisullu akissutaanik imaqtartut, aallarniutigalugit innersuussutigineqassapput. Immikkoortuni tullerni atortussat taakku (ungaluusikkani) arlaleriarluni innersuussutigineqarput.

Isumaliutissiissummi ilanngussat G-M, Aningaasaqarnermut Ataatsimiititaliap Naalakkersuisunik siunersiuinissamat ilassutaasunik apeqqutaanik imallit, aallarniutigalugu malugeqquneqassapput.

Aningaasanut inatsisissatut siunnersuutip aappassaaneerineqarnissaata ullormut kingusinnerusumut nuuneqarnissaa Aningaasaqarnermut Ataatsimiititaliap Siulittaasoqarfimmu qinnutigisariaqarsimavaa. Aningaasanut inatsisissatut siunnersuutip ataatsimiititaliamit illersorneqarsinnaasumik suliarineqarnissaanut piffissaqartinneqarsinnaaqqulluni taama kinguartitsinissaq pisariaqartutut ataatsimiititaliamit isigineqarsimavoq. Ukiakkut ataatsimiinneq ukioq manna kingusinnerulaartukku aallartippoq. Kiisalu assigiinngitsunik pissuteqarlu tik peqannginnerannik pissuteqartumik Naalakkersuisunut ilaasortanik arlalinnik siunersiuinissamik ataatsimiititaliap kissaatai ingerlanneqanngitsoorput. Naalakkersuisut akissutaasa suliarinissaannut piffissamik annertunerusumik atuinissap Aningaasaqarnermut Akitsuusiisarnermullu Ataatsimiititaliamit pisariaqartinneqarneranik tamanna nassataqarpoq.

Siunersioarniarlugu Naalakkersuisumik sukkulluunniit ataatsimiititaliaq aggersaasinnaammat erseqqissaatigineqassaaq. Kiisalu immikkorluinnaq pisoqartillugu aammalu ataatsimiititaliap naliliinera malillugu pissutissaqavittoqartillugu siunersiuineq atorfilittaq ataaseq arlallilluunniit peqataatinneqarnerisigut ingerlanneqarsinnaavoq. Aningaasanut inatsisissatut siunnersuutip aappassaaneerineqarnissanut pingajussaaneerineqarnissaanullu aningaasanut inatsimmik suliarininnermi piffissami aalajangiisuusumi Aningaasaqarnermut Ataatsimiititaliap paasissutissanik



annertunerusunik pisariaqartitsinerani Naalakkersuisut ataasiakkaat pissarsiarineqarsinnaannginnerat immikkut isornartoqarmat ataatsimiititaliamit erseqqissaatigineqassaaq. Assersuutigalugu napparsimaneq pissutigalugu Naalakkersuisut ataasiakkaat takkussinnaanngippata ataatsimiititaliamit paasinnittumik pissuseqarfigineqartarpoq. Tamanna aamma atuuppoq assersuutigalugu peqannginnissaq nalunaarutigineqareersoq pissutigalugu Naalakkersuisoq takkussinnaanngikkaangat tamatumalu peqatigisaanik telefonikkut assigisaatigulluunniit siunersiuinermi peqataasinnaanngikkaangat. Taamaattoqartillugu ataatsimiititaliap isumaa malillugu naapertuuttuussaaq Naalakkersuisut siulittaasuut, Naalakkersuisunut ilaasortat akornanni sulianik agguataarisutut, Naalakkersuisumik allamik taartaasinnaasumik nassaarsinnaasuuppat. Taamaaliorneq aningaasanut inatsimmik suliaqarnermi Inatsisartut Naalakkersuisullu suleqatigiittariaqarnerannut ataatsimiititaliap isumaa malillugu siuarsaataassaaq.

Naalakkersuisut akissutaasa kalaallisuunngortinnerisa ilaatigut kingusissorujussuakkut nassiuneqartarnerat ataatsimiititaliamit aamma naammagineqanngilaq, tamannami ataatsimiititaliap sularineranut pisarissersuutaasinnaammat. Naalakkersuisut sulineranni ajornartorsiut taanna uteqqiattuummatt ataatsimiititaliamit ilisimaneqarpoq. Taamaattumillu ataatsimiititaliaq isumaqarpoq suliassaqarfik taanna pingaarutilik nukittorsarniarlugu Naalakkersuisut iliuuseqartariaqartut.

### **2.1. Suliassaqarfik 10-12 Naalakkersuisut siulittaasuut**

Suliassaqarfimmi tassani Naalakkersuisut akissutaannik misissuinerminut atatillugu Naalakkersuisut siulittaasuannik ataatsimiititaliaq siunersiuivoq. Aggeqqusissut siunersiuinernullu allakkiaq kiisalu ilanngussat tassunga atasut isumaliutissiisummut ilanngussaq G-tut ilanngunneqarput.

Naalakkersuisumik siunersiuineq ull. 26. oktober ingerlanneqarpoq ilanngussaq G-milu takuneqarsinnaasutut apeqqutit pingasut Naalakkersuisumut oqaloqatiginnissutigineqarnissaat ataatsimiititaliamit kissaatigineqarpoq. Naalakkersuisut akissutaannut tunngatillugu ilanngussaq G innersuussutigineqarpoq.

Immikkoortup taassuma ataani suliassat ilaat apeqqutigissallugu ataatsimiititaliamit naleqquttutut isigineqartoq tassaavoq mittarfeqarfiit aqqissugaanerisa nutarterneqarnissaannut aningaasalersuineq pillugu isummernissamat tunngavissiorinissaq pilersaarutigineqartoq aningaasanut inatsisissatut siunnersuommatt nassuiaatini taaneqartoq. Taamalilluni ilaatigut nassuiaatini allasimavoq aningaasaatitigut aqqissugaanerup naleqqussarneraniit aamma Namminersorlutik Oqartussanit pigineqartut ingerlatseqatigiiffiit tuninerisigut immikkut ittumik isertitat, naatsorsuutigineqarluni aningaasalersuinissamat tapertaalluarumaartut. Tassunga atatillugu ingerlatseqatigiiffiit aalajangersimasut eqqarsaatigineqarnersut ataatsimiititaliap Naalakkersuisunut apeqqutigaa. Naalakkersuisut paasissutissiisutigaa oqaluttuarisaarnermit isigalugu tassunga atatillugu Royal Greenlandi eqqarsaatigineqartartoq. Naalakkersuisut isumaqarput tunisisinnaaneq atituumik politikikkut tapersorsorneqartariaqartoq peqatigisaanillu paasissutissiinerit tunngavigalugit pisariaqartoq. Kiisalu Naalakkersuisut paasissutissiippat Kalaallit Nunaanni mittarfinnik sanaartornissamat aningaasalersuinissamat tunngatillugu ingerlatseqatigiiffimmik tamakkiisumik ilaannakortumilluunniit tunisineq aqutigalugu aningaasalersuinissamat aningaasarsiniarnissamik maannakkorpiaq pilersaaruteqartoqanngitsaq.

Tamanna pillugu ataatsimiititaliap apeqqutaanut akissutitut Tele Greenland aamma Air Greenland qaangiisumik aningaasaateqartartut Naalakkersuisunit oqaatigineqarpoq. Naalakkersuisut paasissutissiinerat malillugu ingerlatseqatigiiffiit qaangiisumik aningaasaateqartarnerannut tun-

ngaviusoq tassaavoq sinneqartoorutit annertunerpaartaasa imaluunniit tamakkerlugit suliffeqarfimmut ikineqaannartarnerat imaluunniit akiitsunik akilersuinnermut atorineqartarnerat. Naalakkersuisut isumaat malillugu aningaasat atorineqaratik uninngatiinnarneqartut tassani pineqarput suliffeqarfimmi piviusumik sulitinneqaratik ingerlatseqatigiiffimmi uninngasut. Tassunga atatillugu Naalakkersuisut isummernissamut tunngavissiarilersaagaata inernerit ataatsimiititaliamit qilanaarineqarput. Ataatsimiititaliap apeqquai Naalakkersuisullu akissutaat ilanngussaq G-imi ilanngunneqartumi takuneqarsinnaapput.

## **2.2. Suliassaqarfik 20-24 Aningaasaqarnermut Aatsitassanullu Naalakkersuisoq**

Suliassaqarfimmi tassani Naalakkersuisut akissutaannik misissuinnerminut atatillugu Naalakkersuisumik siunersiuinissamut ataatsimiititaliaq aggersaavoq. Aggeqqusissut siunersiuinnermullu allakkiaq kiisalu ilanngussat tassunga atasut isumaliutissiisummut ilanngussaq H-tut ilanngunneqarput.

Napparsimaneq pissutigalugu Naalakkersuisumik siunersiuineq ingerlanneqanngilaq ilanngussaq H-milu takuneqarsinnaasut apeqquait 11-t Naalakkersuisullu allannguutissatut siunersuutaannut tunngasumik ilassutitut apeqquait 4-it Naalakkersuisumut oqaloqatiginnissutigineqarnissaat ataatsimiititaliamit kissaatigineqarpoq. Taarsiullugu siunersiuinissamut apeqquait allakkatigut akissutinik Naalakkersuisoq nassiussivoq. Naalakkersuisut akissutaannut tunngatillugu ilanngussaq H innersuussutigineqarpoq.

### Konto pingaarneq 20.11.51 Aaqqissuusseqqinnerit sunniutaat

Aaqqissuusseqqinnissat pilersaarutaasut ullormit siullermit kommuninit aquneqarsinnaasunnissaat pingaaruteqarmat ataatsimiititaliamit oqaatigissallugu pingaartinneqarpoq. Aaqqissuusaaikkut allannguinissat innuttaasunit tutsuigineqassappata allaffissornikkut sullissisussat piareersimanissaat malittarisassanillu nutaanik aallaqqaammulli atuisinnaanissaat pingaaruteqarpoq. Aaqqissuusseqqinnerit kingunerisaannik innuttaasut ajornartorsiuteqalersinnaasut sapinngisamik ikinnerpaatinneqarnissaat ataatsimiititaliamit kissaatigineqarpoq.

### Konto pingaarneq 20.11.56 Missingersuutinik iluarsineq, allaffissorneq

Kikkut angerlarsimaffimmini interneteqannginnerisut Naalakkersuisunit akineqarsinnaanngilaq, taggineqarporli taakku innuttaasut 23 %-erissagaat. Ataatsimiititaliaq isumaqarpoq taakku kikkunerat piaartumik paasineqartariaqartoq aammalu taakku digitalinngorsaanermit ilaatinniarnerannut suut akimmisaarutaanersut paasiniarneqarlutik.

## **2.3. Suliassaqarfik 30 Ilaqutariinnermut, Naligiissitaanermut Isumaginninnermullu Naalakkersuisoq**

Suliassaqarfimmi tassani Naalakkersuisut akissutaannik misissuinnerminut atatillugu Naalakkersuisumik siunersiuinissamut ataatsimiititaliaq aggersaavoq. Aggeqqusissut siunersiuinnermullu allakkiaq kiisalu ilanngussat tassunga atasut isumaliutissiisummut ilanngussaq I-tut ilanngunneqarput.

Sapaatip akunnerani siunersiuinissamik ingerlatsiviusussami Naalakkersuisoq peqanngimmat Naalakkersuisumik siunersiuineq ingerlanneqanngilaq ilanngussaq I-imi takuneqarsinnaasut apeqquait marluk Naalakkersuisumut oqaloqatiginnissutigineqarnissaat ataatsimiititaliamit kissaatigineqarpoq. Taarsiullugu siunersiuinissamut apeqquait allakkatigut akissutinik Naalakkersuisoq nassiussivoq. Naalakkersuisut akissutaannut tunngatillugu ilanngussaq I innersuussutigineqarpoq.

Tamanna pillugu misissueqqissaarneq aallartinneqarsimammat innuttaasut ikiliartornerannik innuttaasut amerliartornerannut saatitsinissamut sunik periarfissaqarnerisooq Naalakkersuisunit maannangaq takuneqarsinnaanersoq ataatsimiititaliamit apeqqutigineqarpoq. Tassunga atatillugu ilaqutariit meerartallit nunatsinniinnissamut kajuminnerulersillugillu nunatsinniiginnar-nissaannut peqataaqataasinnaasumik Naalakkersuisut kommunillu ilaqutariinnut meerartalinnut akuersaartumik anguniagaqarnissaat ataatsimiititaliamit ujartorneqarpoq, tamannalu ataatsi-miititaliap isumaa malillugu innuttaasut ikiliartorfianni pingaaruteqarpoq.

#### **2.4. Suliassaqarfik 34-35 Peqqissutsimut Naalakkersuisooq**

Suliassaqarfimmi tassani Naalakkersuisut akissutaannik misissuinerminut atatillugu Naalakker-suisumik ataatsimiititaliaq siunersuivoq. Aggeqqusissut siunersuinernullu allakkiq kiisalu ilanngussat tassunga atasut isumaliutissiissummut ilanngussaq J-tut ilanngunneqarput.

Naalakkersuisumik siunersuineq 26. oktober ingerlanneqarpoq ilanngussaq J-milu takune-qarsinnaasutut apeqqutit marluk Naalakkersuisumut oqaloqatiginnissutigineqarnissaat ataatsi-miititaliamit kissatigineqarpoq. Naalakkersuisut akissutaannut tunngatillugu ilanngussaq J innersuussutigineqarpoq.

Siunersiorneqarnerminni Naalakkersuisut paasissutissiissutigaat utaqqinerit sivikillineqarnissaat Naalakkersuisunit ukkanneqartoq. Taamaattumillu Naalakkersuisut tamatumunnga aningaasanik immikkut atuisimapput. Naalakkersuisut paasissutissiipput 2013-2015 akornanni Peqqinnissa-qarfimmut aningaasaleeqqinnerup kingorna seeqqukkat siffiak kullu suliaritinnernut, sunngap aqqutaatigut suliaritinnernut, kingusinnerusukkullu inalugarsuakkut qinnguartertinnernut, isip igalaasartaasaanik ersernerlutsitsisalerneq kinguneranik suliaritinnernut kiisalu siutip igalaasaanik suliarinninnernut utaqqisarneq malunnaatilimmik sivikinnerulertoq. Taamaasillu-nilu suliaritinnissamut utaqqinerit tamarmik ukioq ataatsip ukiullu aappaata affaata akornanni sivilussuseqalerput. Naalakkersuisut ilanngullugu paasissutissiissutigaat napparsimasut amerlassusaat maannamut isaasut amerlassusaat naatsorsuutigigaanni, utaqqinerup sivilussusaata attatiinnarnissaa ilimanarsinnaasoq, tamannalu qulakkeerneqarsinnaasoq pisinnaasat annertu-sineratigut, aalajangersimasumik 9 mio. kr.-inik tapiinikkut. Tassunga tunngatillugu ataatsi-miititaliamit oqaatigineqassaaq utaqqinerup suli annertunerumik sivikillineqannginnera naalakkersuinikkut aalajangiinerusoq.

Siunersuinerminni immikkoortup aappaatut tikinneqarpoq paaqqutarinninnermut tunngasuni Peq-qinnissaqarfiup kommunit sullikkai napparsimavimmut isumagisarialinnik inissiinikkut, taakkuuppullu kommunit tigusinnaangisaat. Naalakkersuisut paasissutissiipput paaqqutarinnin-nissamut uninngatitsisarneq tamatumalu malitsigisai napparsimmavinni nunallu immikkoortuisa akoranni sunniutai assigiinngitsorujussuusut. Taamaattumillu Peqqinnissaqarfimmit siunissaq eqqarsaatigalugu taakkununnga tunngatillugu kommuninik isumaqatigiissuteqarnissaq kissaatigi-nartinneqarpoq. Paaqqutarisariallit taakku pillugit ajornartorsiutit piaartumik aaqqiivigine-qartariaqartut ataatsimiititaliaq isumaqarpoq. Kommunit Namminersorlutillu Oqartussat ataatsi-moorussamik aaqqiinissaminnik ajornakusoortitsinerat innuttaasunut tutsinneqassanngitsoq ataatsimiititaliaq isumaqarpoq. Naak paaqqutarinninnermut tunngasut kommunit suliassari-galuaat ataatsimiititaliap isumaa malillugu akissussaaffik kommunit kisimik isumagisassa-rinngilaat.

## **2.5. Suliassaqarfik 40 Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisoq**

Suliassaqarfimmi tassani Naalakkersuisut akissutaannik misissuinerminut atatillugu Naalakkersuisumik siunersiuinissamut ataatsimiititaliaq aggersaavoq. Aggeqqusissut siunersiuinermullu allakkiaq kiisalu ilanngussat tassunga atasut isumaliutissiisummut ilanngussaq K-tut ilanngunneqarput.

Sapaatip akunnerani siunersiuinissamik ingerlatsiviusussami Naalakkersuisoq peqanngimmat Naalakkersuisumik siunersiuineq ingerlanneqanngilaq ilanngussaq K-milu takuneqarsinnaasutut apeqquutit 6-it Naalakkersuisumut oqaloqatiginnissutigineqarnissaat ataatsimiititaliamit kissaatigineqarpoq. Taarsiullugu siunersiuinissamut apeqquutinut allakkatigut akissutinik Naalakkersuisoq nassiussivoq. Naalakkersuisut akissutaannut tunngatillugu ilanngussaq K innersuussutigineqarpoq.

## **2.6. Suliassaqarfik 50-51 Aalisarnermut, Piniarnermut Nunalerinermullu Naalakkersuisoq**

Suliassaqarfimmi tassani Naalakkersuisut akissutaannik misissuinerminut atatillugu Naalakkersuisumik ataatsimiititaliaq siunersiuivoq. Aggeqqusissut siunersiuinermullu allakkiaq kiisalu ilanngussat tassunga atasut isumaliutissiisummut ilanngussaq L-tut ilanngunneqarput.

Naalakkersuisumik siunersiuineq 26. oktober ingerlanneqarpoq ilanngussaq L-milu takuneqarsinnaasutut apeqquutit marluk Naalakkersuisumut oqaloqatiginnissutigineqarnissaat ataatsimiititaliamit kissaatigineqarpoq. Naalakkersuisut akissutaannut tunngatillugu ilanngussaq L innersuussutigineqarpoq.

Tunup imartaata nillernera siunissami siunissami pisassatut naatsorsuutigisanik allatut naliliinissamut Naalakkersuisut tunngavississimaneraat siunersiuinermi apeqquutigineqarpoq. Tamanna avaleraasartoorniarnermi naatsorsuutigisat nalilernerannik allannortitsinissamut tunngavissiiingitsoq Naalakkersuisut paasissutissiipput.

2014-imi TAC-it pisassiisutillu pillugit Naalakkersuisut nassuiaataanni allassimavoq aalisakkat assigiinngitsut pillugit siunnersuinerit nalinginnaasumik junip qaammataani aammalu raajat saattuallu pillugit siunnersuinerit novembarimi tunniunneqartartut. Aningaasanut inatsisissatut siunnersuutip aappassaaneernejarnissaani Naalakkersuisut allannguutissatut siunnersuutaanni nr. 23-mi allassimavoq iluanaarutissatut missingikkat 2016-imi 37,0 mio. kr.-inik ukiunilu missingersuusiorfiusuni 52,0 mio. kr.-inik qummut iluarsineqartut. Taamaattumillu raajanut TAC-p qaffaatissaatut naatsorsuutigineqartoq qaqugu pissanersoq aningaasanut inatsisissatut siunnersuutip aappassaaneernejarnerani paasissutissiisutigineqassasoq ataatsimiititaliamit kissaatigineqarpoq.

## **2.7. Suliassaqarfik 62-66 Inuussutissarsiornermut, Suliffeqarnermut, Niuernermut Nunanullu Allanut Naalakkersuisoq**

Suliassaqarfimmi tassani Naalakkersuisut akissutaannik misissuinerminut atatillugu Naalakkersuisumik siunersiuinissamut ataatsimiititaliaq aggersaavoq. Aggeqqusissut siunersiuinermullu allakkiaq kiisalu ilanngussat tassunga atasut isumaliutissiisummut ilanngussaq M-tut ilanngunneqarput.

Sapaatip akunnerani siunersiuinissamik ingerlatsiviusussami Naalakkersuisoq peqanngimmat Naalakkersuisumik siunersiuineq ingerlanneqanngilaq ilanngussaq M-milu takuneqarsinnaasutut apeqquutit 6-it Naalakkersuisumut oqaloqatiginnissutigineqarnissaat ataatsimiititaliamit kissaa-

tigineqarpoq. Taarsiullugu siunersiuinissamut apeqqutitut allakkatigut akissutit Naalakkersuisoq nassiussivoq. Naalakkersuisut akissutaannut tunngatillugu ilanngussaq M inner-suussutigineqarpoq.

### **2.8. Suliassaqarfik 73-77 Pinngortitamut, Avatangiisut Inatsisinillu Atuutsitsinermut Naalakkersuisoq**

Suliassaqarfimmi tassani Naalakkersuisut akissutaannik misissuinerminut atatillugu Naalakkersuisoq ataatsimiititaliamit apeqquteqarfigineqarpoq. Apeqqutit akissutillu isumaliutissiisummut ilanngussaq N-tut ilanngunneqarput.

Imermut/innaallagissamut/kiassarnermut akeqartitseriaasissap nutaap suliarinissaanut maanna pilersaaruteqartoqarmat pitsaasutut ataatsimiititaliamit isigineqarpoq. Tamanna nunatsinni tamanut, tassa innuttaasunut inuussutissarsiortunullu sunniuteqartussaammat ataatsimiititaliap qanimut malinnaaffigissavaa.

### **3. Aningaasaliissutitut allannguutissatut siunnersuutit**

Immikkoortoq 1.3.3-mi taaneqartutut aningaasanut inatsisissatut siunnersuummut allannguutissatut siunnersuutit 63-inik Naalakkersuisut saqqummiussipput. Taakkunanga 15-it oqaasertaliussanut allannguutissatut siunnersuutaallutik. Oqaasertaliussanut allannguutissatut siunnersuutit isumaliutissiisutit immikkoortuani 4-mi sammeneqarput.

#### Aningaasaliissutitut allannguutissatut siunnersuutit sammisanut ukununga immikkoortinneqarsimapput:

- sammisaq 1 Aaqquissuinnikkut allannguutit: allannguutissatut siunnersuutit 13-it
- sammisaq 2 Missingersuutitut sunniuteqanngitsumik allannguutit: allannguutissatut siunnersuutit 4-t
- sammisaq 3 Isertitaqarnerunissamik inatsisitigullu aningaasartuutit pissussaaffigisanit naatsorsuutit nutaat: allannguutissatut siunnersuutit 11-t
- sammisaq 4 Aningaasartuuteqarnerunissamik kissaatit: allannguutissatut siunnersuut 1
- sammisaq 5 Ilanngaassivik: allannguutissatut siunnersuutit 3-t
- sammisaq 6 Kontumit pingaarnermi atugassanngortitsineq, 20.11.56 Missingersuutitut iluarsiineq, allaffissorneq: allannguutissatut siunnersuutit 4-t
- sammisaq 7 Kontumit pingaarnermi atugassanngortitsineq, 20.11.70 Suliniutitut nutaanut sillimmatit: allannguutissatut siunnersuutit 7-it
- sammisaq 8 Qorlortorsuarni erngup nukiliorfiup allinera: allannguutissatut siunnersuutit 4-t
- sammisaq 9 Konto pingaarnermi 24.13.50 Akileraartarnermi akitsuusiisarnermilu isertitaqarnerulernissamut sillimmatit: allannguutissatut siunnersuut 1

Aningaasaliissutitut allannguutissatut siunnersuutit nr. 1-imit nr. 48-mut *normulersugaapput*.

Aningaasaliissutitut pineqartillugit allannguutissatut siunnersuutit ataasiakkaat normui *aningaasaliissutitut takussutissiami* allasimapput; *ilanngussaq 1*. Aningaasaliissutitut takussutissiat Naalakkersuisut aningaasaliissutitut allannguutissatut siunnersuutaannut saarlinggorlugit ilanngunneqarput, taakkulu isumaliutissiisummut ilanngussaq E-tut ilanngunneqarlutik.

Oqaasertaliussanut tunngatillugu normuliunneqartoq oqaasertaliussat siornagut allanneqarpoq. Oqaasertaliussat *ilanngussaq 2*-mik taaguuserneqarput. Taakku isumaliutissiisummut ilanngussaq F-p ataani ilanngunneqarput.

### 3.1. Sammisag 1 – Aaqqissuinikkut allannguutit

Qulequttami tassani allannguutissatut siunnersuutinik 13-inik Naalakkersuisut saqqummiussipput. Allannguutissatut siunnersuutit taakku ukiumi aningaasanut inatsiseqarfiusumi ukiunilu missingersuusiorfiusuni ataatsimut isigalugu IST-mut sunniuteqassanngillat. Pineqartut tassaanerupput missingersuutininut ilanngussat oqaasertaasa ilusiligaanerannik erseqqissaanerit annikinnerusut, suliassami kisitsisinik iluarsiiernerit, kukkunernik iluarsiiernerit il.il.

Ukioq manna ilaatigut 86.60.01-imut, Peqqinnissaqarfimmut tunngasumut, aningaasaliissutinik atugassanngortitsisarnermi suliniutit ataasiakkaarlugit nutarterneriffiqineqarput aammalu konto pingaarnermi 34.15.01-imi, Inuunerittamat tunngasumi, aningaasaliissutit atuutsilersinneqaqqillutik.

Allannguutissatut siunnersuutininut ataasiakkaanut Aningaasaqarnermut Ataatsimiititaliaq ilassutitut oqaaseqaatissaqanngilaq. Immikkoortorli siulianiittoq 2.2 naapertorlugu siunnersuuinissamat aggeqqusissummi 25. oktoberimeersumi allannguutissatut siunnersuummut nr. 6-imut apeqqutit itisilerutaasut akineqarnissaannik ataatsimiititaliap Naalakkersuisunut qinnuiginninnera inner-suussutigineqarpoq.

Sammisag 1-ip ataani allannguutissatut siunnersuutit nr. 1-imit 13-imut **akuerineqassasut** Aningaasaqarnermut Ataatsimiititaliamit **inassutigineqarpoq**.

### 3.2. Sammisag 2 – Missingersuutininut sunniuteqanngitsumik allannguutit

Qulequttami tassani allannguutissatut siunnersuutinik 4-nik Naalakkersuisut saqqummiussipput. Allannguutissatut siunnersuutit taakku ukiumi aningaasanut inatsiseqarfiusumi ukiunilu missingersuusiorfiusuni ataatsimut isigalugu IST-mut sunniuteqassanngillat.

Allanngortitsinernut taakkununnga pissutaapput missingersuutininut sunniuteqartussaannngitsumik allanngortitsinerit, tamatumani sanaartornerup iluani 2016-imi aamma 2017-imi sanaartugassanut ataasiakkaanut aningaasaliussat atugassanngortinnissaat qinnutigineqarluni.

Allannguutissatut siunnersuutininut ataasiakkaanut Aningaasaqarnermut Ataatsimiititaliaq ilassutitut oqaaseqaatissaqanngilaq.

Sammisag 2-p ataani allannguutissatut siunnersuutininut nr. 14-mit 17-imut **akuerineqassasut** Aningaasaqarnermut Ataatsimiititaliamit **inassutigineqarpoq**.

### 3.3. Sammisag 3 – Isertitaqarnerunissamik inatsisitigullu aningaasartuutinit pissussaaffigisanit naatsorsuutit nutaat

Qulequttami tassani allannguutissatut siunnersuutinik 11-nik Naalakkersuisut saqqummiussipput. Allannguutissatut siunnersuutit taakku katillutik IST-p inerneranut 2016-imi 20 mio. kr.-inik, 2017-imi 63,0 mio. kr.-inik aammalu 2018-imi 2019-imilu 46,0 mio. kr.-inik pitsanngoriaataassapput.

Isertitassatut missingiutit nutaat, inatsisinik tungaveqarluni aningaasartuutissanut missingiinerit nutaat allannguutissatut siunnersuuteqarfigineqarput biologit siunnersuinerat naapertorlugu raajartassat amerlineqarnerisa kingunerisaanik (raajartassat 83.000 tonsit missingiutigineqarput) aammalu Pituffimmut tunngatillugu Sullissinissamik isumaqatigiissutip massakut isumaqatigiissuteqarfigineqarsimasumit qaammatinik 6-inik sivitsorneqarnerata kingunerisaanik. Paarlattuanik konto pingaarnermi 24.11.26-imi, avaleraasartuunut akitsuutinut tunngasumi, isertitassatut missingiutit ukiumut 81 mio. kr.-init 40 mio. kr.-inut appartineqarput. 40 mio. kr.-nik iluanaaruteqarnissamik missingersuusiornermut tunngaviuvoq 2016-imi 43.000 tonsit missaannik pisaqassangatitsineq, tassa 2013-imit 2015-imut agguaqatigiissillugu pisarineqarsimasut 20%-inik ilanngarlugit.

Allannguutissatut siunnersuutinut ataasiakkaanut Aningaasaqarnermut Ataatsimiititaliaq ilassutitut oqaaseqaatissaqanngilaq.

Sammissaq 3-p ataani allannguutissatut siunnersuutit nr. 18-imit 28-mut **akuerineqassasut** Aningaasaqarnermut Ataatsimiititaliamit **inassutigineqarpoq**.

### **3.4. Sammissaq 4 – Aningaasartuuteqarnerunissamik kissaatit**

Qulequttami tassani allannguutissatut siunnersuummik ataatsimik Naalakkersuisut saqqummiussipput. Allannguutissatut siunnersuut taanna IST-p inerneranut 2016-imi ukiunilu missingersuusiorniusuni ataasiakkaani 1,0 mio. kr.-inik ajorseriaataassaaq.

Aningaasartuutaanerusussanut, konto pingaarnermut 77.05.02-mut, Pinngortitaleriffimmut tunngasumut, 1,0 mio. kr.-inik immikkoortitsisoqarpoq. Biologit ammassannik misissuinerannut aningaasaliissutit atorineqassapput, ammassak aalisagaavoq UKA 2015 aqutugalugu akitsuuserniarneqartoq.

Allannguutissatut siunnersuutinut ataasiakkaanut Aningaasaqarnermut Ataatsimiititaliaq ilassutitut oqaaseqaatissaqanngilaq.

Sammissaq 4-p ataani allannguutissatut siunnersuut nr. 29 **akuerineqassasoq** Aningaasaqarnermut Ataatsimiititaliamit **inassutigineqarpoq**.

### **3.5. Sammissaq 5 – Ilanngaassivik**

Qulequttami tassani allannguutissatut siunnersuutinik 3-nik Naalakkersuisut saqqummiussipput. Allannguutissatut siunnersuutit taakku ukiumi aningaasanut inatsiseqarfiusumi ukiunilu missingersuusiorniusuni ataatsimut isigalugu IST-mut sunniuteqassanngillat.

Ilanngaassivik innuttaasut pisortanut akiligassaanut akiliisitsiniarnermi atortuuvoq, taannalu Akileraartarnermut Aqutsisoqarfiup akiliisitsiniartarnermut periarfissaanik pitsannorsaaataassaaq aammalu akiitsut siunissami annertusiartornissaraluannut pinngitsoortitsisinnaalluni.

Allannguutissatut siunnersuummut Aningaasaqarnermut Ataatsimiititaliaq ilassutitut ima oqaaseqaateqarumavoq. Immikkoortoq siulianiittoq 2.2 naapertorlugu siunnersuunissamut aggeqqusissummi 25. oktoberimeersumi allannguutissatut siunnersuummut nr. 32-imut apeqqutit itisilerutaasut akineqarnissaannik ataatsimiititaliap Naalakkersuisunut qinnuiginninnera innersuussutigineqarpoq.

Konto pingaarneq 24.01.15 Pisassanut allanut siusinnerusukku isumakkiikkanut akiliutit

Aningaasaqarnermut Ataatsimiititaliami ikinnerussuteqartut Inuit Ataqtigiit ilaasortaataat allannguutissatut siunnersuut pillugu oqaaseqaat imaattoq saqqummiutissavaat:

Inuit Ataqtigiit Ilangaassivik tapersersoorpaat Naalakkersuisullu suliniummik aallartitsimmata nersualaarumallugit. Isumaqarpugulli 2018-imiilli 30 millioninik pissarsiaqartalereernissap piviusorsioortuunera Naalakkersuisut naammaginatut ilimanarsisissimangikkaat. Missingersuutit piviusorsioortuunissaat Inuit Ataqtigiinnit pingaartinneqarpoq. Taamaattumillu allannguutissatut siunnersuut 32 Inuit Ataqtigiinnit itigartinneqartariaqarpoq, tassa naatsorsukkanik eqqornerusunik aammalu 2018-imiilli 30 millioninik pissarsiaqartalereernissamik qulakkeerinnittunik aappassaaneerinninnissaq sioqqullugu Naalakkersuisut saqqummiussingippata.

(Allannguutissatut siunnersuut nr. 32)

Sammissaq 5-ip ataani allannguutissatut siunnersuutit 30-mit 31-mut **akuerineqassasut** Aningaasaqarnermut Ataatsimiititaliamit **inassutigineqarpoq**.

Allannguutissatut siunnersuut nr. 32 **akuerineqassasoq** Aningaasaqarnermut Ataatsimiititaliami amerlanerussuteqartut Siumup, Atassutip Demokraatillu ilaasortaataasa **inassutigaat**.

Naatsorsukkanik eqqornerusunik aammalu 2018-imiilli 30 millioninik pissarsiaqartalereernissamik qulakkeerinnittunik aappassaaneerinninnissaq sioqqullugu Naalakkersuisut saqqummiussingippata allannguutissatut siunnersuut nr. 32 **itigartinneqassasoq** Aningaasaqarnermut Ataatsimiititaliami ikinnerussuteqartut Inuit Ataqtigiit ilaasortaataasa **inassutigaat**.

### **3.6. Sammissaq 6 – Kontumit pingaarnermit atugassanngortitsineq, 20.11.56 Missingersuutit iluarsineq, allaffissorneq**

Qulequttami tassani allannguutissatut siunnersuutit 4-nik Naalakkersuisut saqqummiussippat. Allannguutissatut siunnersuutit taakku ukiumi aningaasanut inatsiseqarfiusumi ukiunilu missingersuusiorfiusuni ataatsimut isigalugu IST-mut sunniuteqassanngillat.

"Sanaartornermik ingerlatsinerup aserfallatsaaliinerullu qitiusumit isumagineqartalernerat"-nut aningaasaliissutit atugassanngortinneqarnissaat allannguutissatut siunnersuutikkut qinnutigineqarpoq.

Allannguutissatut siunnersuutit ataasiakkaanut Aningaasaqarnermut Ataatsimiititaliaq ilassutitut oqaaseqaatissaqanngilaq.

Sammissaq 6-ip ataani allannguutissatut siunnersuutit nr. 33-mit 36-mut **akuerineqassasut** Aningaasaqarnermut Ataatsimiititaliamit **inassutigineqarpoq**.

### **3.7. Sammissaq 7 – Kontumit pingaarnermit atugassanngortitsineq, 20.11.70 Suliniutinut nutaanut sillimmatit**

Qulequttami tassani allannguutissatut siunnersuutit 7-inik Naalakkersuisut saqqummiussippat. Allannguutissatut siunnersuutit taakku ukiumi aningaasanut inatsiseqarfiusumi ukiunilu missingersuusiorfiusuni ataatsimut isigalugu IST-mut sunniuteqassanngillat. Taakku atornerluisunik katsorsaasarnissamut pilersaarummut aningaasaliissutit atugassanngortinneqarnissaannut aam-



malu nunalerinermi nammineq pilersornerup annertusarneqarnissaanut aningaasaliissutinut 8 mio. kr.-iusunut, tassunga ilanngullugu toqoraavimmik Neqi A/S-imik sullissinissamik isumaqatigiissummut aningaasaliissutit atugassanngortinnissaanut tunngapput.

Allannguutissatut siunnersuutinut ataasiakkaanut Aningaasaqarnermut Ataatsimiititaliaq ilassutitut oqaaseqaatissaqanngilaq.

Konto pingaarneq 64.10.17 Nunami inuussutissarsiutinut takornariartitsinermullu tapiissutit 2015-imi aningaasanut inatsisissatut siunnersuummik suliarinninnermut atatillugu 2015-imi aningaasanut inatsit pillugu Naalakkersuisut aammalu Siumut, Atassut kiisalu Demokraatit isumaqatigiissuteqarput. Taamatut isumaqatigiissuteqarnerup kingunerisaanik pingajussaaneerinninnissamut allannguutissatut siunnersuut nr. 160 saqqummiunneqarpoq, taannalu aqutigalugu "Eqqumiitsuliernerup misigisassarsiortitsisarnerullu ineriartortinnerat" Visit Greenlandip ataani ingerlatatut ingerlaannarnissaa qulakkeerneqarpoq. Aningaasaliissutit aningaasat ukiuanut 2015-imut ukiunullu missingersuusiorfiusunut atuupput.

Visit Greenlandimut aningaasaliissutit amerlineqarnissaannik Inatsisartut kissaataat taanna 2015-imut unneqqarilluni ilanngunneqarsimasoq Naalakkersuisut paasissutissiissutigaa. Misigisassarsiortitsinermili inuussutissarsiutini ineriartortitsinissami suliniutissat aalajangersimasut piviusunngortinneqartussat pillugit immikkut isumaqatigiissuteqarnissaq Naalakkersuisut kissaatigaa.

Aningaasanut inatsimmut atatillugu isumaqatigiissut siuliani taaneqartoq naapertorlugu aningaasaliissutit taakku konto pingaarnerup matuma ataani Visit Greenlandip ataani ingerlatanut atugassatut maannatut ingerlaannarnissaat Aningaasaqarnermut Akileraartarnermullu Ataatsimiititaliamit kissaatigineqarpoq. Tamanna pillugu pingajussaaneerinninnissamut allannguutissatut siunnersuummik saqqummiusseqqullugit Naalakkersuisut Aningaasaqarnermut Akileraartarnermullu Ataatsimiititaliamit qinnuigineqarput.

Sammisaaq 7-ip ataani allannguutissatut siunnersuutinut nr. 37-imit 43-mut **akuerineqassasut** Aningaasaqarnermut Ataatsimiititaliamit **inassutigineqarpoq**.

### **3.8. Sammisaaq 8 – Qorlortorsuarni erngup nukiliorfiup allinera**

Qulequttami tassani allannguutissatut siunnersuutinik 4-nik ukiumi aningaasanut inatsiseqarfiusumi IST-p inerneranut 72,0 mio. kr.-inik 2017-imilu 18,0 mio. kr.-inik ajorseriaataasunik aammalu 2018-imi 2019-imilu IST-p inerneranut sunnuteqanngitsunik Naalakkersuisut saqqummiussipput. Matumani Qorlortorsuarni erngup nukinga atorlugu innaallagissiorfiup allilerneqarnissaanut aningaasaliisoqarnissaa qinnutigineqarpoq, suliaq una isummernissamut immikkut tunngavissiaq aqutigalugu Naalakkersuisunit suliarineqarpoq. Iliuseriniakkap 2016-imut IST-p inerneranut annertuumik ajorteriartitsissaaq IS-illu inerneranut sunniutissai annikitsuinnaassallutik.

Allannguutissatut siunnersuummut Aningaasaqarnermut Ataatsimiititaliaq ilassutitut ima oqaaseqaateqarumavoq.

Taamaalillunilu tamanna pillugu Naalakkersuisut ilisimatitsissutaat Aningaasaqarnermut Akileraartarnermullu Ataatsimiititaliamit tiguneqarpoq – (suliaq nr. 01.31.29-00341). Suliassaq taanna ataatsimiititaliamit ull. 19. oktober suliarineqarpoq.

Tassani ilaatigut allassimavoq Qaqortumi Narsamilu kissamik pisariaqartitsineq naammassinnaaniarlugu pisinnaasanik annertusititsinissaaq pisariaqartinneqartoq.

Paasissutissiissutigineqarpoq Qorlortorsuarmi erngup nukinganik inaallagissiorfiup allineqar-nissaani uulia atorlugu uunnaaviit innaallagiasq atorlugu uunnaavinnik taarserneqarsinnaa-lernissaat siunertarineqartoq, taamaalillunilu nukissiuutit ataavartut atorneqarnerat annertu-sissalluni. Naalakkersuisut paasissutissiissutigaat Nukissiorfiit misissueqqaarnerisa takutikkaat, illoqarfinni marluusuni taakkunani innaallagissamik kiassarnermik qaminneqarsinnaasumik tunitsivissanut tunngaviusut annertungaatsiartut, aammalu uulia atorlugu kissamik tunisassior-nerup nukissiuutitik ataavartunik taarserneqarsinnaaneranut periarfissat annertusut. Nukissiorfiit naliliipput erngup nukinganik innaallagissiornermi isumalluutit annertusineqarnerini, aammalu Qaqortumi eqqakkanik ikuaallaaviup allineqarnerani, Narsami Qaqortumilu kissamik tunitsivissat naammattumik annertussuseqartut.

Alliliinissamik eqqarsaateqarnermi aamma sumiiffimmi aatsitassarsiornermi suliaqarfinnut tunisisinnaanissaq tunngavigineqarpoq. Peqatigitillugu Naalakkersuisunit erseqqissaatigineqar-poq inuiaqatigiit aningaasaqarnerannut sunniutissanik naliliineq malillugu suliassaq inuiaqatigiit aningaasaqarneranni iluanaaruteqarfiusussatut naliliiffigineqarmat, aatsitassarsiorfinnut tunisisin-naaneq naatsorsuinermit ilaatinneqanngikkaluartoq.

Aningaasaqarnermut Ataatsimiititaliami ikinnerussuteqartut Inuit Ataqtigiit ilaasortaataataat allannguutissatut siunnersuut pillugu oqaaseqaat imaattoq saqqummiutissavaat:

Qorlortorsuarmi erngup nukinganik nukissiorfiup allilernerneqarnissaa aatsitassarsiorfinnut tunisisinnaaneq naatsorsuinermit ilanngutinngikkaluarlugu inuiaqatigiit aningaasaqarneranni iluanaaruteqarfiusinnaasoq Inuit Ataqtigiit maluginiarpaat. Inuit Ataqtigiinnit aamma maluginiarneqarpoq Naalakkersuisut ima allattut ”sumiiffimmi aatsitassarsior-nissaq eqqarsaatigalugu annertuumik nalornisoqarmat”. Tamanna assut tupaallannartutut isigivarput paasissutissarlut taanna Aatsitassanut Ataatsimiititaliamut eqqumaffigeqqussallutigu. Tamatuma saniatigit sammisaq 8 Inuit Ataqtigiit allamik oqaaseqaatissaqarfingnilaat.

Sammisaq 8-p ataani allannguutissatut siunnersuutit nr. 44-mit 47-mut **akuerineqassasut** Aningaasaqarnermut Ataatsimiititaliamit **inassutigineqarpoq**.

### **3.9. Sammisaq 9 – Konto pingaarnermi 24.13.50 Akileraartarnermi akitsuusiisarnermilu isertitaqarnerulernissamat sillimmatit**

Qulequttami tassani allannguutissatut siunnersuummik ataatsimik ukiumi aningaasanut inatsiseqarfiusumi ukiunilu missingersuusiorfiusuni ataasiakkaani IST-p inerneranut 42,0 mio. kr.-inik ajorseriaataasumik Naalakkersuisut saqqummiussipput. Sammisaq 3-misut akileraa-rutinit tamakkiisunit isertitassatut missingiinerit pitsanngoriartinniarlugit isertitassatut sillimmatit ukiumut 42 mio. kr.-inik annikillisinneqarnissaat qinnutigineqarpoq. Akitsuutinut tunngatillugu aningaasanut inatsimmi isumaqatigiissutit ilaannut tunngasut appartinnissaanut ilaasutut isigisassaavoq. Isertitassatut sillimmatit sinneri ukiumut 54,5 mio. kr.-iusut pingajussaa-neerinninnissami atugassanngortinnissaat qinnutigineqassasoq Naalakkersuisunit paasissutis-siissutigineqarpoq.

Allannguutissatut siunnersuutinut ataasiakkaanut Aningaasaqarnermut Ataatsimiititaliasq ilassu-titut oqaaseqaatissaqanngilaq.

Sammisaq 9-p ataani allannguutissatut siunnersuut nr. 48 **akuerineqassasoq** Aningaasaqar-nermut Ataatsimiititaliamit **inassutigineqarpoq**.

#### 4. Oqaasertaliussanut allannguutissatut siunnersuutit

##### 4.1 Naalakkersuisut oqaasertaliussanut allannguutissatut siunnersuutaat

Oqaasertaliussanut allannguutissatut siunnersuutit katillugit 15-inik Naalakkersuisut siunnersuuteqarput. Allannguutissatut siunnersuutit taakku 49-mit 63-imut normoqarput.

Oqaasertaliussanut allannguutissatut siunnersuutit aningaasanut inatsisissatut siunnersuummut *ilanngussaq 2-mut* attuumassuteqarput. Taakku isumaliutissiissumut ilanngussaq F-ip ataanut ilanngunneqarput.

Allannguutissatut siunnersuutit ataatasiakkaanut Aningaasaqarnermut Ataatsimiititaliaq ilassutit ima oqaaseqaateqarumavoq.

Naalakkersuisut allannguutissatut siunnersuutaannik misissuinerminut atatillugu Aningaasaqarnermut Aatsitassanullu Naalakkersuisumik siunnersuutissamut ataatasiititaliaq aggersaavoq. Aggeqqusissut siunnersuutissamullu allakkiaq isumaliutissiissumut ilanngussaq H-tut ilanngunneqarput.

Napparsimaneq pissutigalugu Naalakkersuisumik siunnersuutit ingerlanneqanngilaq ilanngussaq H-milu takuneqarsinnaasutut apeqqutit 4-t Naalakkersuisumut oqaloqatiginnissutigineqarnissat ataatasiititaliamit kissaatigineqarpoq. Allannguutissatut siunnersuummut nr. 50-imut aamma 56-imut allannguutissatut siunnersuutit Naalakkersuisut aappasaaneerinnissamut nassiusseqqullugit ataatasiititaliamit qinnuigineqarmata immikkut oqaatigineqassaaq. Taarsiullugu siunnersuutissamut apeqqutinut allakkatigut akissutinik Naalakkersuisoq nassiusivoq. Naalakkersuisut akissutaannut tunngatillugu ilanngussaq L innersuusutigineqarpoq.

##### Konto pingaarnermut 20.11.50-imut Ingerlatsinermit sillimmatit

Aningaasaqarnermut Akileraartarnermullu Ataatsimiititaliap siumoortumik akuersissuteqareerneratigut sillimmatitit tapiissutit aatsaat aningaasaliissuteqartoqartassasoq Aningaasaqarnermut Ataatsimiititaliamit isumaqatigiittumit kissaatigineqarpoq.

(Allannguutissatut siunnersuut nr. 50)

Aningaasaqarnermut Ataatsimiititaliaq allannguutissatut siunnersuummik saqqummiussivoq. Takuuk allannguutissatut siunnersuut nr. 65.

##### Konto pingaarnermut 62.30.03-mut Eqqartuussisutigoortitsinermit aningaasaliissutit, Atuisartunut Unammilleqatigiinnermullu Aqutsisoqarfik

Ataatsimiititaliami ikinnerussuteqartut Inuit Ataqtigiit ilaasortaataat allannguutissatut siunnersuut pillugu ima oqaaseqaateqarumapput:

Aningaasaqarnermut Ataatsimiititaliap akulerunneqarnissaanut sooq aningaasat 2,5 mio. kr.-it killiliunneqarsimanersut Naalakkersuisunit akineqanngilaq. Inuit Ataqtigiit allannguutissatut siunnersuummik saqqummiussissapput, tamatumani aningaasat 1 mio. kr.-it sinnerlugit atugassiissutigineqassatillugit Aningaasaqarnermut Ataatsimiititaliamut saqqummiussisoqartassaaq.

(Allannguutissatut siunnersuut nr. 55)

Inuit Ataqtigiit tamatumunnga allannguutissatut siunnersuummik saqqummiussissapput. Takuuk allannguutissatut siunnersuut nr. 64.

Konto pingaarnermut 64.10.27-imut Inuussutissarsiutit ineriartortinnerinut pilerisaarinernullu suliniutit

Konto pingaarnermut nutaamut 64.10.27-mut, inuussutissarsiutit ineriartortinnerinut pilerisaarinernullu suliniutinut tunngasumut, atatillugu qinnutigineqarpoq isertitaqarnerup erseqqissa-gaanngitsup taamaaqatai innersuussutigalugit aningaasartuutit amerlanerit akilernissaannut Naalakkersuisut piginnaatinneqassasut, tamannalu missingersuusiortarneq pillugu inatsimmi ilanngaattissat ilanngaatigereernagit periutsimik saneqqutsineruvoq. Missingersuusiortarneq inatsimmi tunngavinnik malinninnginnissamut Naalakkersuisut piginnaatinneqarnissaat Aningaasaqarnermut Ataatsimiititaliamit isumaqatigiittumit akuerineqarsinnaanngilaq.

(Allannguutissatut siunnersuut nr. 56)

Konto pingaarnermut 72.20.05-imut Ilaasunik angallassinermut tapiissutit

Suliassaqarfimmi tassani Naalakkersuisut akissutaannik misissuinerminut atatillugu ataatsimiititaliaq Ineqarnermut, Sanaartornermut Attaveqarnermullu Naalakkersuisumik siunersuiuvoq. Aggeqqusissut siunersuiunermullu allakkiaq kiisalu ilanngussat tassunga atasut isumaliutissiis-summut ilanngussa O-tut ilanngunneqarput. Kiffartuussinissamik isumaqatigiissutinik atuut-tunik sivitsuinissamik suliaqarneq suli naammassisimangimmat ataatsimiititaliamit tupigusuu-tigineqarpoq. Taamaattumillu ullormi siunersuiunerup ingerlanneqarfiani taakku naammassineqarsimanerat ataatsimiititaliamit nuannaarutigineqarpoq.

(Allannguutissatut siunnersuut nr. 59)

Oqaasertaliussanut allannguutissatut siunnersuutit nr. 49, 51-imit 54-imut aamma 57-imit 63-imut **akuerineqassasut** Aningaasaqarnermut Ataatsimiititaliamit **inassutigineqarpoq**.

Oqaasertaliussanut allannguutissatut siunnersuutit nr. 50 aamma 56 **itigartinneqassasut** Aningaasaqarnermut Ataatsimiititaliamit **inassutigineqarpoq**.

Aningaasaqarnermut Ataatsimiititaliami amerlanerussuteqartut Siumup, Atassutip Demokratillu ilaasortaataaasa **inassutigaat** oqaasertaliussanut allannguutissatut siunnersuut nr. 55 **akuerineqassasoq**.

Aningaasaqarnermut Ataatsimiititaliami ikinnerussuteqartut Inuit Ataqtigiit ilaasortaataaasa **inassutigaat** oqaasertaliussanut allannguutissatut siunnersuut nr. 55 **itigartinneqassasoq**.

**4.2. Inatsisartuni partiit oqaasertaliussanut allannguutissatut siunnersuutaat**

Oqaasertaliussanut allannguutissatut siunnersuummik ataatsimik Inuit Ataqtigiit saqqum-miussipput. Allannguutissatut siunnersuut Naalakkersuisut oqaasertaliussanut allannguutissatut siunnersuutaannut nr. 55-imut attuumassuteqarpoq.

**Nr. 64.**

**Konto pingaarnermut 62.30.03-mut Eqqartuussisutigoortitsinermut aningaasaliis-sutit, eqqartuussivimmi suliat Atuisartunut Unammilleqatigiinnermullu Agutsisoqar-fik**

Oqaasertaliussap matuma kingulianiittup ilanngunneqarnissaa qinnutigineqarpoq:

”Konto pingaarnermi matumani eqqartuussivimmi sulianut, taarsissuteqarnernut il.il. aningaasartuutit tamarmik akilerneqartarput. Aningaasat 1.000.000 koruuninik amerlane-

rusut atugassiissutigineqarnissaat sioqqullugu Aningaasaqarnermut Akileraartarnermullu Ataatsimiititaliamut saqqummiunneqassapput.”

**Konto pingaarnermut 62.30.03-mut Eqqartuussisutigoortitsinermut aningaasaliisutit, eqqartuussivimmi suliat Atuisartunut Unammilleqatigiinnermullu Aqutsisoqarfik, nassuiaatit**

Nassuiaatip matuma kingulianiittup ilanngunneqarnissaa qinnutigineqarpoq:

”Atuisartunut Unammilleqatigiinnermullu Aqutsisoqarfimmut, Ineqarneq pillugu Naammagittaalliuuteqartarfimmut, Inunnik Isumaginninnermut Naammagittaalliuuteqartarfimmut, Atuisartunut Pisisartunullu Maalaaruteqartarfimmut, Unammilleqatigiinnermut Ataatsimiititaliamut, Avatangiisit Innarlitsaaliorneqarnissaat pillugu Naammagittaalliuuteqartarfimmut aamma Pinngortitap Illersorneqarnera pillugu Ataatsimiititaliamut, Nalunaarasuartaateqarnermut Aqutsisoqarfimmut aamma Radiomik Ingerlatsivimmut missingersuutinut akisussaaffik Atuisartunut Unammilleqatigiinnermullu Aqutsisoqarfiup isumagisaraa. Konto pingarneq manna pilersinneqarpoq eqqartuussisutigoortitsinermi aningaasartuutit il. il., tassa aqutsisoqarfiup misilinneqarnerani imaluunniit oqartussaasut aqutsisoqarfimmik allattoqartut aalajangiineranni aningaasartuutaasinnaasut aningaasalersorneqarnissaat qulakkeerniarlugit.

Oqaasertaliussaq nutaajuvoq.”

(Allannguutissatut siunnersuut nr. 64)

Aningaasaqarnermut Ataatsimiititaliami amerlanerussuteqartut Siumup, Atassutip Demokratitillu ilaasortaataasa **inassutigaa**t oqaasertaliussanut allannguutissatut siunnersuut nr. 64 **itigartinneqassasoq**.

Aningaasaqarnermut Ataatsimiititaliami ikinnerussuteqartut Inuit Ataqtigiit ilaasortaataasa **inassutigaa**t oqaasertaliussanut allannguutissatut siunnersuut nr. 64 **akuerineqassasoq**.

**4.3 Aningaasaqarnermut Akileraartarnermullu Ataatsimiititaliap oqaasertaliussanut allannguutissatut siunnersuutaa**

Aningaasaqarnermut Ataatsimiititaliap oqaasertaliussanut ataatsimik allannguutissatut siunnersuuteqarpoq. Allannguutissatut siunnersuut Naalakkersuisut oqaasertaliussanut allannguutissatut siunnersuutaannut nr. 56-imut attuumassuteqarpoq.

**Konto pingaarnermut 20.11.50-imut Ingerlatsinermut sillimmatit**

Siuliani oqaatigineqartutut Aningaasaqarnermut Akileraartarnermullu Ataatsimiititaliap siumoortumik akuersissuteqareerneratigut sillimmatinit tapiissutitut aatsaat aningaasaliissuteqartoqartassasoq Aningaasaqarnermut Akileraartarnermullu Ataatsimiititaliamit isumaqatigiittumit kissaatigineqarpoq. Taamaattumillu aningaasanut inatsisissatut siunnersuutip aappasaaneer- neqarnissaanut oqaasertaliussanut allannguutissatut siunnersuummik saqqummiusseqqullugit Naalakkersuisut ataatsimiititaliamit qinnuigineqarput. Tamannali naapertuutinnigitsutut Naalakkersuisunit isigineqarpoq. Ataatsimiititaliali isummernini aalajangiusimavaa, taamaattumillu Naalakkersuisut oqaasertaliussanut allannguutissatut siunnersuutaat nr. 50 itigartinneqassasoq inassutigalugu.

Tamanna tunngavigalugu oqaasertaliussassaq nutaaq una Aningaasaqarnermut Akileraartarnermullu Ataatsimiititaliamit siunnersuutigineqarpoq.

**Nr. 65**

**Konto pingaarnermut 20.11.50-imut Ingerlatsinermut sillimmatit**

Allannguutissatut siunnersuutikkut matumuuna Naalakkersuisut kissaatigaat oqaasertaliussap matuma imarisai allangortinneqassasut, taamaalilluni oqaasertaliussaq ajunaarnersuarni inunnik ikiuiniarnermut aamma atorneqarsinnaalluni.

Oqaasertaliussap ukuninnga taaserneqarnissaat qinnutigineqarpoq:

"

Pinngortitami imaluunniit ajunaarnersuarni inunnik ikiuiniarnermut atatillugu nunat tamalaat akornani ikiuiniaqatigiiffinnut tapiutitut koruunit millionit affaasa atugassanngortinnissaannut Naalakkersuisut piginnaatinneqarput.

"

**Konto pingaarnermut 20.11.50-imut Ingerlatsinermut sillimatinut nassuiaatit**

Oqaasertaliussamut nassuiaat ukuninnga taaserneqassasoq qinnutigineqarpoq:

Pinngortitami imaluunniit ajunaarnersuarni inunnik ikiuiniarnermut atatillugu nunat tamalaat akornani ikiuiniaqatigiiffinnut ukiumoortumik tapiutitut katillugit koruunit millionit affaat atugassanngortinneqarsinnaapput. Aningaasaqarnermut Akileraartarnermullu Ataatsimiititaliap siumoortumik akuersissuteqareerneratigut aningaasaliissutissanut tunngavigineqartut iluanni aningaasanik tunniussisoqarnissaanik Naalakkersuisut piginnaatinneqarput.

Oqaasertaliussat AI 2015-imit iluarsineqarlutik ingerlateqqitaapput.”

(Allannguutissatut siunnersuut nr. 65)

Oqaasertaliussanut allannguutissatut siunnersuut nr. 65 **akuerineqassasoq** Aningaasaqarnermut Ataatsimiititaliamit **inassutigineqarpoq**.

**5. Aningaasaqarnermut Ataatsimiititaliap inassuteqaatai**

Taama oqaaseqarluni Aningaasaqarnermut Ataatsimiititaliap aningaasanut inatsisissatut siunnersuut Inatsisartunit aappassaaniigassanngortippaa.

Sammissaq 1-ip ataani allannguutissatut siunnersuutit nr. 1-imit 13-imut **akuerineqassasut** Aningaasaqarnermut Ataatsimiititaliamit **inassutigineqarpoq**.

Sammissaq 2-p ataani allannguutissatut siunnersuutinut nr. 14-mit 17-imut **akuerineqassasut** Aningaasaqarnermut Ataatsimiititaliamit **inassutigineqarpoq**.

Sammissaq 3-p ataani allannguutissatut siunnersuutit nr. 18-imit 28-mut **akuerineqassasut** Aningaasaqarnermut Ataatsimiititaliamit **inassutigineqarpoq**.

Sammissaq 4-p ataani allannguutissatut siunnersuut nr. 29 **akuerineqassasoq** Aningaasaqarnermut Ataatsimiititaliamit **inassutigineqarpoq**.

Sammissaq 5-ip ataani allannguutissatut siunnersuutit 30-mit 31-mut **akuerineqassasut** Aningaasaqarnermut Ataatsimiititaliamit **inassutigineqarpoq**.

Allannguutissatut siunnersuut nr. 32 **akuerineqassasoq** Aningaasaqarnermut Ataatsimiititaliami amerlanerussuteqartut Siumup, Atassutip Demokratillu ilaasortaatitaasa **inassutigaat**.

Naatsorsukkanik eqqornerusunik aammalu 2018-imiilli 30 millioninik pissarsiaqartalereer-nissamik qulakkeerinnittunik aappassaaneerinninnissaq sioqqullugu Naalakkersuisut saqqum-miussingpata allannguutissatut siunnersuut nr. 32 **itigartinneqassasoq** Aningaasaqarnermut Ataatsimiititaliami ikinnerussuteqartut Inuit Ataqtigiit ilaasortaatitaasa **inassutigaat**.

Sammissaq 6-ip ataani allannguutissatut siunnersuutit nr. 33-mit 36-mut **akuerineqassasut** Aningaasaqarnermut Ataatsimiititaliamit **inassutigineqarpoq**.

Sammissaq 7-ip ataani allannguutissatut siunnersuutit nr. 37-imit 43-mut **akuerineqassasut** Aningaasaqarnermut Ataatsimiititaliamit **inassutigineqarpoq**.

Sammissaq 8-p ataani allannguutissatut siunnersuutit nr. 44-mit 47-mut **akuerineqassasut** Aningaasaqarnermut Ataatsimiititaliamit **inassutigineqarpoq**.

Sammissaq 9-p ataani allannguutissatut siunnersuut nr. 48 **akuerineqassasoq** Aningaasaqarner-mut Ataatsimiititaliamit **inassutigineqarpoq**

Oqaasertaliussanut allannguutissatut siunnersuutit nr. 49, 51-imit 54-imut aamma 57-imit 63-imut **akuerineqassasut** Aningaasaqarnermut Ataatsimiititaliamit **inassutigineqarpoq**.

Oqaasertaliussanut allannguutissatut siunnersuutit nr. 50 aamma 56 **itigartinneqassasut** Aningaasaqarnermut Ataatsimiititaliamit **inassutigineqarpoq**.

Aningaasaqarnermut Ataatsimiititaliami amerlanerussuteqartut Siumup, Atassutip Demokratillu ilaasortaatitaasa **inassutigaat** oqaasertaliussanut allannguutissatut siunnersuut nr. 55 **akuerineqassasoq**.

Aningaasaqarnermut Ataatsimiititaliami ikinnerussuteqartut Inuit Ataqtigiit ilaasortaatitaasa **inassutigaat** oqaasertaliussanut allannguutissatut siunnersuut nr. 55 **itigartinneqassasoq**.

Aningaasaqarnermut Ataatsimiititaliami amerlanerussuteqartut Siumup, Atassutip Demokratillu ilaasortaatitaasa **inassutigaat** oqaasertaliussanut allannguutissatut siunnersuut nr. 64 **itigartinneqassasoq**.

Aningaasaqarnermut Ataatsimiititaliami ikinnerussuteqartut Inuit Ataqtigiit ilaasortaatitaasa **inassutigaat** oqaasertaliussanut allannguutissatut siunnersuut nr. 64 **akuerineqassasoq**.

Oqaasertaliussanut allannguutissatut siunnersuut nr. 65 **akuerineqassasoq** Aningaasaqarnermut Ataatsimiititaliamit **inassutigineqarpoq**.

Inatsisartut suliarinninnerat tunngavigalugu Inatsisartut inaarutaasumik pingajussaaneerinnillutik suliarinninnissaat sioqqullugu Aningaasaqarnermut Akileraartarnermullu Ataatsimiititaliamut suliarineqaqqittussanngorlugu inatsisissatut siunnersuut ingerlateqqinneqassasoq ataatsimiititaliamit **inassutigineqarpoq.**

---

Jens Immanuelen,  
Siulittaasoq

---

Steen Lyngé

---

Jess Svane

---

Tillie Martinussen

---

Naaja Nathanielsen

---

Sara Olsvig

---

Peter Olsen